

## পবিত্র ইঞ্জিল শরিফ ১৯ নম্বর ছিপারা আল-ইবরানি পরিচিতি

পবিত্র আছমানি কিতাবর অউ আল-ইবরানি ছিপারা লেখাছইন, আল্লা পাকর হুকুমে হজরত ইছা আল-মসীর একজন সাহাবিয়ে। হজরত ইছায় বেহেস্তে তশরিফ নেওয়ার অনুমান ৩০-৩৫ বছর বাদে অউ ছিপারা লেখা অইছে। হজরত মুছার (আ:) উম্মত ইছদি ধর্মর যেতা মানষে হজরত ইছার তরিকা কবুল করছিল্লা, তারা নানান নমুনার বিপদো পড়লা, অউ বিপদর লাগি তারার মাজর কেউ কেউ হিরবার পুরানা ধর্মত ফিরিয়া যাইতাগি চাইছইন, এরাে উত্সাহ দিবার লাগি অউ ছিপারা লেখা অইছে।

আমরা জানি, দুনিয়ার হকল ধর্মর এবাদত খানার মাজে একটা খাছ পবিত্র জাগা বা হেরেম শরিফ থাকে, এর ভিতরে সাধারণ এবাদতকারি হামানি নিষেধ। অতা থাকি আমরা বুজি, ধর্ম মানিয়া আল্লার ধারো যাইবার উপায় নাই, কুনুমশ্তেউ আল্লার খাছ দিদার মিলে না। তান দিদার মিলে খালি হজরত ইছা আল-মসীর উছিলায়; যেলা ই ছিপারার ৯ রুকু ২৪ আয়াতো আছে, “আল-মসী তো মানষর আতর বানাইল কুনু পাক জাগাত হামাইছইন না, তাইন খালি আসল বেহেস্তে হামাইছইন, যাতে আমরার নাজাতর লাগি আল্লার ছামনে অখন আজির অইতা পারইনা।” আর ১০ রুকু ১৯ আয়াতো আছে, “এরলাগিউ ও ভাই অকল, হজরত ইছা আল-মসীর লউর জরিয়ায়, আমরা বেহেস্তি খাছ পাক জাগাত হামানির সাওস পাইছি।”

**এরমাজে আছে,**

- (ক) নবী আর ফিরিস্তা অকল থাকি ইছা আল-মসী মহান ১-২ রুকু
- (খ) আল-মসীর জরিয়ায়উ আল্লার দেওয়া আরাম ৩:১-৪:১২ আয়াত

- (গ) হকল কুরবানি থাকি আল-মসীর কুরবানি মহান ৪:১৩-৭:২৮  
 (ঘ) আল্লার লগে মিলনর নয়্যা আর চিরকালিন উছিলা ৮-১০ রুকু  
 (ঙ) ইমানি বুজুর্গান আর আল-মসীর বায় চাইয়া ছামনেদি দৌড়াই  
 ১১-১৩ রুকু

## নবী আর ফিরিস্তা অকল থাকি ইছা আল-মসী মহান (১:১-২:১৮)

হজরত ইছা আল-মসীউ কলিমাতুল্লা

1 আল্লা পাকে আগর জমানাত নানান নমুনায় নবী অকলর মাজদিয়া আমরার ময়-মুরবিব অকলর গেছে টুকরা টুকরা করি ওহী বেজিছইন, 2 অইলে অখন আখেরি জমানাত আইয়া তাইন ওহীরে মানুষ ছুরতে সরাসরি বেজিছইন। অউ মানুষ অইলা আল্লার খাছ মায়ার পুতর লাখান, এন নামউ কলিমাতুল্লা, মানি আল্লার ওহী। অউ মায়ার পুত কলিমাতুল্লার আতোউ তাইন হক্কলতার মালিকানা দিলাইছইন, এন উছিলায় আহমান-জমিন আর হক্কলতা পয়দা অইছে। 3 এইনউ অইলা আল্লার শান-তজল্লির নুর, তান মাজদিয়াউ আল্লা পাকে নিজরে জাইর করছইন। অউ মায়ার পুত কলিমাতুল্লার হুকুমর বলে, তামাম জগতর হক্কলতা চলো। তাইন দুনিয়ার মানষর গুনারে ধইয়া ছাফ করিয়া, আরশে-আজিমো আল্লার ডাইনর তখতো তশরিফ রাখছইন।

ফিরিস্তা অকল থাকি হজরত ইছা মহান

4 ইতা দেখিয়া আমরা বুজি, আল্লায় তানরে ফিরিস্তা অকল থাকি আরো বেশি মরতুবা আলা নাম দিছইন, আর খেলা নাম অউলা ইজ্জতও দান করছইন। 5 আল্লায় কুন্দি কুন্দি ফিরিস্তারে ইলা কথা কইছইন না,

তুমি তো আমার পুত,

আইজ আমিউ তুমার বাফর লাখান অইলাম।

বা,

আমিউ তার বাফর লাখান আইমু  
আর হে আইবো আমার পুত।

6 তাইন য়েবলা তান খাছ পরধান পুতরে দুনিয়াত বেজিলা, অউ সময়  
ফিরিস্তা অকলরে হুকুম দিলা,

ও ফিরিস্তা অকল, তুমরা এনরে সইজদা করে।

7 আল্লায় ফিরিস্তা অকলর বেয়াপারে কইরা,

ফিরিস্তা অকলরে তাইন হাওয়ার নমুনায় পয়দা করছইন,  
নিজর খাদিম অকলরে আগুনির ফুলকির লাখান বানাইছইন।

8 আইলে অউ পুতর বেয়াপারে তাইন কইরা,

ইয়া-এলাহি, তুমার তখত হর-হামেশা বওয়াল রইবো,  
তুমার ইনছাফউ আইলো হক ইনছাফ,

9 তুমি নাফরমানিরে ঘিন্নাও আর দীনদারিরে ভাল পাও,  
এরলাগি আল্লায়ও, তুমার আল্লায় তুমারে খেলাফতি দিছইন,

তুমারে ইজ্জতি গদি দান করছইন,  
তুমার ভাই-বিরাদর থাকিও  
তুমারে বউত বেশি খুশি দিছইন।

10 আল্লায় আরো কইরা,

ও মালিক, তুমিউ পয়লা দুনিয়ার ইয়ান খুটি গাড়িছো,  
আছমান অকলও তুমার আতে পয়দা করছে।

11 ইতা হক্কলতা বিনাশ অইঘিবো,  
অইলে তুমি তো হামেশা বওয়াল রইবায়।

ইতা কাপড়র লাখান পুরান অইঘিবো,

12 তুমি ইতারে চাদরর লাখান ভাইঞ্জ করিয়া থইবায়,  
ফিন্দিবর কাপড়র লাখান ইতা হক্কলতা বদলাইবায়।  
অইলে তুমি যেলা আছো, অউলাউ রইবায়,  
তুমার হায়াতি কুনুদিনউ ফুড়াইতো নায়।

13 আর আল্লায় কুনুদিন কুনু ফিরিস্তারে ইলা কথা কইছইন না,

তুমার দুশমন অকলরে যতদিন তুমার পাওর তলাত না ফালাই,  
অতো দিন তুমি আমার নিজর তখতর ডাইন গালাত বও।

14 ফিরিস্তা অকল তো খালি খেজমত কররা রুহ নায় নি? যেরা নাজাত  
হাছিল করবা, তারার উপকার করার লাগিউ এরাতে বেজা অইছে।

## 2

খিয়ালি অওয়ার লাগি হশিয়রি

1 তে অউ পুতর বেয়াপারে আমরা যততা ছনছি, ইতা খুব খিয়াল  
করিয়া সমজা দরকার, আরনায় আন্তে আন্তে ই তালিম থাকি বে-পথে  
যাইতামগি পারি। 2 ফিরিস্তার মারফতে বাতাইল কালাম যেবলা কাইম  
রইছে, আর যেরা ই কালামর উল্টা চলছিল, এরাও তারার পাওনা সাজা

পাইছে, <sup>3</sup>তাইলে আল্লায় তান খাছ মেহেরবানিয়ে আমরার লাগি অখন যে নাজাতর পথ তিয়ার করছইন, ই পথর উল্টা চললে আমরা কুন্স বাচমু নি? অউ নাজাতর কথা তো হক্কল পয়লা মালিক ইছায় নিজেউ কইছইন, আর যেরা ইতা হনছিল তারাও পুরাপুর ছাফ করিয়া আমরা কইছইন, ইতা এক্কেবারে হাছ। <sup>4</sup>এরার লগে আল্লায় নিজেও নানান কিছিমর কুদরতি আলামত, কেলামতির বল-তাক্কতদি অউ নাজাতর পক্ষে সাক্কি দিছইন। আর নিজর মর্জিয়ে পাক রুহর দেওয়া নানান নিয়ামত বিলাই দিয়াও সাক্কি দিছইন।

দুখ-কষ্টর মাজদি হজরত ইছা নাজাতর কাভারি

<sup>5</sup>তে আমরা যে বাতুনি বাদশাইর কথা কইয়ার, ই বাদশাই তো আল্লায় কুন্স ফিরিস্তার জিন্মায় রাখছইন না। <sup>6</sup>বরং আল্লার কালামর মাজে একজনে বাতাইছইন,

মানুষ আরকতা কিতা যেন তুমি তারারে ইয়াদ করো?

মানষর আওলাদউ বা কিতা যেন তারারে দেখা-হুনা করো?

<sup>7</sup>তুমি তো মানষরে ফিরিস্তা থাকি খালি খুড়া লামাত লামাইছে,

গৌরব আর ইজ্জতর মালা তো মানষরেউ দান করছো।

তুমার পয়দা হক্কলতার উপরে এরারে ইজ্জত দিছো,

<sup>8</sup>হক্কলতাউ এরার পাওর তলাত, এরার আওতায় রাখছো।

তে আল্লায় হক্কলতারে এরার আওতায় আনায়, এরার খেমতার বারে আর কুন্সউ রইছে না। অইলে অখনও তো হক্কলতারে আমরার নিজর আওতায় দেখরাম না। <sup>9</sup>খালি হউ ইছারে দেখরাম, তানরে ফিরিস্তা অকল থাকি খুড়া লামাত লামাইল অইছিল, যাতে আল্লার রহমতে দুনিয়ার তামাম মানষর জান বাচানির লাগি, তান নিজর জান বিলাই দেইন। হাছাউ তাইন খুব কষ্ট পাইয়া নিজর জান বিলাই দিয়া মারা গেছইন, এরলাগিউ দেখরাম, আল্লায় তানরে অউ ইজ্জত আর গৌরবর মালা ফিন্দাইছইন।

10 আসলে হক্কলতাউ তো আল্লার লাগি, তাইনউ হক্কলতা পয়দা করছইন, আর তান খিয়াল অইলো তান বউত আওলাদও তান শান-মহিমার ভাগি অইন। এরলাগিউ তারার নাজাতর কাভারি অউ ইছারে দুখ-কষ্ট দিয়া কামিল বানাইছইন, যাতে এন লগ ধরিয়া এরা তান গেছে আইন। 11 তে যে ইছায় মানষরে পাক-ছাফ করইন আর যেরা পাক-ছাফ বনইন, এরা হক্কলউ তো এক আল্লার পরিবারর। অতার দায় ইছায় এরাতে ভাই কইয়া ডাকতে কুন্ শরম পাইন না। 12 তাইন কইছইন,

আমি আমার ভাইয়াইন্তর গেছে তুমার নাম তবলিগ করমু,  
সমাজর মাজে তুমার তারিফ-গজল গাইমু।

13 তাইন হিরবার কইছইন, আমি আল্লার উপরে ভরসা করমু।

আর আরকবার কইছইন,

দেখউক্কা, আমিও আছি আর হউ আওলাদ অকলও অনো আছইন,  
যেরারে আল্লায় আমার আতো সপিয়া দিছইন।

14 আইছা, তে ই আওলাদ অকল তো রক্ত-মাংসর মানুষ, গতিকে ইছা নিজেও অউলা রক্ত-মাংসর কায়ায় জনম লইলা। খালি অউ কায়ায় মউতর উছিলায়, মউতর খেমতার মালিক হউ ইবলিছরে ঘায়েল করতা পারইন, 15 আর মরনর ডরে যেরা হারা জিন্দেগি মউতর গুলামর লাখান কাটাইরা, তারারেও আজাদ করতা পারইন। 16 তাইন তো ফিরিস্তা অকলরে সাইহ্য করইন না, খালি ইব্রাহিমর আওলাদ অকলরেউ সাইহ্য কররা। 17 ই হক্কলতা পুরাপুর আদায় করার লাগি ইছারও জরুর আছিল, তাইন নিজেও অউ ভাইয়াইন্তর লগে হকল বেয়াপারে হমানি অওয়া। হমানি অইয়া আল্লার দরবারো নির্ভর করার

জুকা, দিল-দরদি পরধান ইমাম অইতা পারইন। ইমাম বনিয়া মানষর গুনার কফরার লাগি নিজর জান কুরবানি দেইন। 18 তাইন নিজে পরিক্ষাত পড়িয়া দুখ-কষ্ট সইয্য করছইন, এরলাগিউ যেরা পরিক্ষাত পড়ইন তারারেও তাইন সাইয্য করতা পারইন।

## আল-মসীর জরিয়ায়উ আল্লার দেওয়া আরাম (৩:১-৪:১২)

### 3

মুছা নবী থাকি হজরত ইছা ইজ্জতি

1 এরলাগি ও আমার পাক-পরেজগার ভাই অকল, তুমরা যেরা বেহেস্তি দাওতো শরিক অইছো, তুমরা পরতেকেউ ইছার বায় চউখ রাখো। আল্লা পাকে তান ই খাছ খলিফারে বেজিছইন, তাইনউ তো হউ পরধান ইমাম, ইখান আমরা মানছি। 2 হজরত মুছা যেলা আল্লার ঘর-সংসারো নির্ভর করার জুকা আছিল, অউ লাখান ইছারেও যেইন বেজিছইন, অউ আল্লার দরবারো তাইন আছিল নির্ভর করার জুকা। 3 তে ঘর বানাওরা মালিকে যেলা ঘর থাকিও বেশি ইজ্জত পাইন, অউ লাখান আল্লার ঘর-সংসারো হজরত ইছায়ও মুছা নবী থাকি বেশি ইজ্জত হাছিল করছইন। 4 হক্কল ঘরাইনউ তো কুনু না কুনু মানষে বানাইছইন, অইলে যেইন হক্কলতা বানাইছইন তাইনউ আল্লা। 5 আসলে ছামনর জমানার লাগি যেতা বাতাইল অইবো, অতা বেয়াপার জানানির লাগি, মুছা আছিল আল্লার ঘর-সংসারর কাম-কাজো নির্ভর করার জুকা কামলার লাখান। 6 অইলে আল-মসী তো আল্লার ঘর-সংসারর জিম্মাদার হিসাবে নির্ভর করার জুকা পুতর লাখান আছিল। অখন আমরাও যুদি যারযির দিলর আশা আর হিম্মত রাখিয়া মউত পর্যন্ত কাইম রই, তে দেখা যাইবো যেন, আমরাও আল্লার ঘর-সংসারর ভাগি অইছি।

বেইমানির লাগি হুশিয়ারি

7 এরলাগিউ আল্লার পাক রুহে বাতাইছইন,

আইজ যুদি তুমরা তান আওয়াজ হনো,

8 তে তুমরার ময়-মুরবিবির লাখান,

তুমরার নিজর দিলরে পাষান বানাইও না।

আল্লায় কইরা, তারা যেলা মরুভুমির মাজে,

আমার বিরুদ্ধে গিয়া আমারে পরিষ্কা করছিল,

তুমরা ইলা করিও না।

9 তুমরার বাফ-দাদাইন্তে চাল্লিশ বছর ধরি

আমার কুদরতি কাম দেখার বাদেও,

হনো আমারে পরিষ্কা করছইন।

10 এরলাগি আমি তারার উপরে খুব বেজার অইয়া কইলাম,

এরার দিল তো হামেশা বে-পথে চক্কর দেব,

তারা তো আমার পথ চিনলো না।

11 তেউ আমি গুছা করিয়া কছম খাইয়া কইছলাম,

আমার দেওয়া হউ আরামর জাগাত,

এরা হামাইতো পারতো নয়।

12 ভাইয়াইন অকল, হশিয়ার অও! তুমরার দিলর মাজে যানু নাফরমানি আর বেইমানি না হামায়, ইতা হামাই গেলে জিন্দা আল্লার গেছ থাকি নিজরে দুরই হরইলায়। 13 ইতার বদলা যতদিনরে আইজ কইয়া ডাকা অয়, অতদিন তুমরা একে-অইন্যরে সাওস দেও, যাতে কেউ গুনার ফান্দে পড়িয়া নিজর দিলরে পাষান না বানায়। 14 কারন আমরা যুদি পয়লাকুর লাখান হেশ পর্যন্ত ইমানে মজবুত রইয়া চলি, তে বুজা যাইবো আমরা আল-মসীর লগে শরিক অইছি। 15 খুড়া আগে বাতাইল অইছে,

আইজ যুদি তুমরা তান আওয়াজ হনো,



তে তুমরার ময়-মুরবিবির লাখান,  
তুমরার নিজর দিলরে পাষান বানাইও না।

16 আইছা কওছাইন, আল্লার নিজর জবানর বুলি হনার বাদেও খেগিয়ে তান বিরোধিতা করছিল? এরাউ নায় নি, যেরারে মুছা নবীয়ে মিসর থাকি বার করি আনছিল? 17 কওছাইন, আল্লায় চাল্লিশ বছর ধরি কার উপরে বেজার আছলা? এরার উপরেউ নায় নি, যেরা গুনা করছলা আর মরুভুমির মাজে লাশ অইয়া পড়ছলা? 18 আল্লায় কার উপরে বেজার অইয়া কছম খাইয়া কইছলা, ‘আমার দেওয়া হউ আরামর জাগাত এরা হমাইতো পারতো নায়? অউ এরার উপরেউ নায় নি, যেরা তান জবানর বুলি হনিয়াও নাফরমানি করছিল? 19 অতা থাকিউ তো আমরা বুজরাম, ইমান না আনায় তারা আল্লার দেওয়া হউ আরামর জাগাত হমাইতো পারছে না।

## 4

### আল্লার বন্দা অকলর লাগি আরাম

1 আল্লার দেওয়া আরামর জাগাত হমানির ওয়াদা অখনও আমরার লাগি চালু আছে। এরলাগি আও, আমরা আরো হশিয়ার অইয়া চলি, নাইলে দেখা যাইবো হেশে তুমরা কেউ আরামর জাগা থাকি বাদ পড়িগেছে। 2 আমরার গেছে যেলা খুশ-খবরি তবলিগ করা অইছে, বনি ইসরাইলর গেছেও অউলা তবলিগ করা অইছিল, ই খুশ-খবরি হনিয়া তারার কুনু ফায়দা অইছে না, কারন তারা ইতা হনলেও ইমান আনছে না। 3 অইলে আমরা তো ইমান আনছি আর আল্লার ওয়াদা করা হউ আরামর জাগাত হমাইতাম পারিয়ার। অউ আরামর বেয়াপারে আল্লায় কইছইন,

তেউ আমি গুছা করিয়া কছম খাইয়া কইছলাম,

আমার দেওয়া হউ আরামর জাগাত,  
এরা হামাইতো পারতো নয়।

যুদিও দুনিয়া পয়দা করার বাদ থাকিউ, আল্লার ই আরাম তিয়ার করা  
অইছে, তা-ও তাইন অলা কইছইন।<sup>4</sup> অউ আরামর বেয়াপারে আরক  
আয়াতো লেখা আছে, “আল্লায় ই হকল কাম শেষ করিয়া সাত নম্বর  
দিন আরাম করলা, তাইন ইদিন আর কুস্তা পয়দা করলা না।”<sup>5</sup> অইলে  
তাইনউ হিরবার কইছইন,

আমার দেওয়া হউ আরামর জাগাত,  
এরা হামাইতো পারতো নয়।

<sup>6</sup> এরলাগি অউ কথাউ ফয়ছালা অইলো যেন, কিছু মানুষ আল্লার হি  
আরামর মাজে হামাইতা পারবা, অইলে পয়লা যেরার গেছে খুশ-খবরি  
তবলিগ করা অইছিল, তারার নাফরমানির কারনেউ তারা আল্লার হি  
আরামর মাজে হামাইতো পারছে না।<sup>7</sup> আল্লায় বউত দিন আগে ইতা  
বনি ইসরাইলর গেছে বাতাইছলা, বাদে তান আরামর মাজে হামানির  
লাগি হিরবার নয়্য দিন ঠিক করিয়া অউ দিনর নাম দিলা, আইজ।  
হিরবার বউত দিন বাদে তাইন দাউদ নবীর গেছে কইছইন, যেলা উপরে  
লেখা আছে,

আইজ যুদি তুমরা তান আওয়াজ হনো,  
তে তুমরার নিজর দিলরে পাষান বানাইও না।

<sup>8</sup> অখান কওয়ার মানি অইলো, হজরত মুছার মউতর বাদে ইউছা  
নবীয়ে যুদি তারারে হি আরামো হরাইলিতা পারতা, তে আল্লায় বাদে  
আরক দিনর কথা কইলা না অনো।<sup>9</sup> তে বুজা যায়, আরামো হামানির

পথ আল্লার বন্দা অকলর লাগি অখনও খুলা আছে। 10 মূল কথা অইলো, আল্লায় যেলা তান হক্কল কাম শেষ করিয়া বাদে আরাম করছলা, অউ লাখান কুনু বন্দাও তান আরামর মাজে হামাইয়া হারলে, হে-ও তার কাম থাকি আরাম পায়। 11 তে আও, আমরাও হি আরামর মাজে হামানির লাগি খাছ দিলে আগুয়াই, যাতে হউ নাফরমান বনি ইসরাইলর লাখান আল্লার হুকুমর বিরুদ্ধে গিয়া, ই আরাম থাকি বাদ না পড়ি।

12 আল্লার কালাম তো জিন্দা আর বলআলা কামলা, দুইও গালা ধারাইল তলোয়ারর চাইতেও বেশি ধারআলা। ই কালামে ফুড় করিয়া মানষর ভিতরে হামাইয়া দিল-রহ, আডিড-গোসুরে আলগায়, আর দিলর ভিতরর নিয়ত-চিন্তা হক্কলতারে পরিক্ষা করিয়া দেখে। 13 আল্লার পয়দা করা কুনু মখলুকাতউ তান গেছে লুকাইল নায়। তান চউখর হামনে হক্কলতাউ খুলা-মেলা জাইর আছে, তান গেছেউ আমরার হিসাব দিতে অইবে।

## হক্কল কুরবানি থাকি আল-মসী'র কুরবানি মহান (৪:১৩-৭:২৮)

### হজরত ইছা আল-মসী'উ পরধান ইমাম

14 আমরা তো অলা এক পরধান ইমাম পাইছি, যেইন তামাম আছমান পারইয়া হারি আল্লার আরশো তশরিফ নিছইন, তাইনউ আল্লার খাছ মায়ার জন, ইছা ইবনুল্লা। তে আউক্লা, আমরা তান কলিমারে মজবুত করি মানি। 15 কারন আমরা'র পরধান ইমাম ই লাখান নায় যেন, আমরা'র কুনু কমজুরির দুখে তাইন দুখি অইতা নায়, তাইনও আমরা'র লাখান হক্কল জাতর গুনার পরিক্ষাত পড়ছইন, অইলে কুনুজাত গুনা করছইন না। 16 এরলাগি আউক্লা, আমরা হিন্মত করিয়া আল্লার রহমতর তখতর কিনারো যাই, যাতে মেহেরবানি হাছিল করতাম পারি, আর যেলাখান রহমতর গরজ আছে, অউ লাখান রহমতও পাই।

## 5

1 মানষর পক্ষে রইয়া আল্লার এবাদতির লাগি মানষর মাজ খনেউ পরতেক পরধান ইমামরে পছন্দ করি নেওয়া অয়। তান কাম অইলো মানষর গুনা মাফির লাগি পশু কুরবানি দেওয়া আর হকল জাতর লিল্লা-ছদগা বখশিয়া দেওয়া। 2 যেরা না বুজিয়া গুনা করে আর বে-পথি অয় এরার লগে তাইন নরম বেবহার করতা পারইন, কারন তান মাজেও কমজুরি আছে। 3 তাইন যেলা অইন্য মানষর গুনার লাগিয়া কুরবানি দেইন, অউলা তান নিজর কমজুরি আর গুনার লাগিও কুরবানি করা ফরজ।

4 পরধান ইমাম অওয়ার ইজ্জত কেউ নিজে নিজে কামাইতো পারে না, খালি আল্লায় যেনরে পছন্দ করইন তাইনউ ই ইজ্জত হাছিল করইন, যেলা আল্লায় হারুণ নবীরে ই ইজ্জত দিছলা। 5 ইছায়ও অউলা পরধান ইমাম অওয়ার লাগি নিজে নিজরে বড় বানাইলা না, বরং আল্লায়উ তানরে অউ গৌরব দান করছইন, আল্লায় বাতাইছইন,

তুমি তো আমার পুত,

আইজ আমিউ তুমার বাফর লাখান অইলাম।

6 তাইন অউলা আরক আয়াতো কইছইন,

বাদশা মালকী-সিদ্দিকর নমুনায়,

তুমিউ হর-হামেশাকুর ইমাম।

7 আল্লায় তো ইছারে মউতর আত থাকি বাচাইতা পারলা অনে, ইছা দুনিয়াত থাকার সময় তান গেছে আহাজারি করি কান্দিয়া দোয়া-মিনতি করি ভিক মাগিছইন, তান মাজে আল্লার ডর-খফ আর বাইধ্যতা থাকায় ইতার জুয়াপও পাইছইন। 8 তাইন পুত অইলেও কষ্ট সহিয়া

করিয়া, আল্লার বাইধ্য অইয়া রওয়া হিকিছইন, 9-10 আর অউ লাখান রইয়া তাইন য়েবলা পুরাপুর কামিল বনিগেলা, আল্লায় তানরে মালকী-সিদ্দিকর নমুনায় পরধান ইমামর খেতাব দিলা, অউ নমুনায় তান বাইধ্য উন্মত অকলর লাগি আল্লাই নাজাতর পথ খুলিয়া দিছইন।

ইমান থাকি না হরার লাগি হুশিয়ারি

11 মালকী-সিদ্দিকর বেয়াপারে আমরার আরো বউত বয়ান আছে, অইলে তুমরার কানো তালা লাগাই দিছো করি তুমরারে ইতা বুজানি খুব কষ্ট। 12 অতদিনর মাজে তুমরাও উস্তাদ অইযিতায় আছিল, অইলে অখনও দেখা যার তুমরারে আল্লার কালামর পয়লা ছবক হিকানি লাগবো। তুমরারে অখনও হুরতর লাখান দুধ খাওয়ানি লাগের, শক্ত খানা হজম করতায় পাররায় না। 13 আর যেরা দুধ খায় তারা তো গেদা হুরতা, শরিয়তর হুকুম-আহকামর বেয়াপারে তারা কুস্তাউ বুজে না। 14 শক্ত খানা তারার লাগিউ যেরার বয়স অইছে, তারা ভালা-বুরার তফাত বুজিয়া আখল খাটাইয়া চলে।

## 6

1 ইছার বেয়াপারে আমরা পয়লা যেতা তালিম পাইছি, আউক্লা ইতারে পারইয়া আমরা আরো আগেদি আণ্ডয়াইয়া কামিল অই। হউ পয়লাকুর তালিম হিরবার হিকার আর গরজ নাই, যেমন নাফরমানি কাম থাকি দিলরে বদলানি, আল্লার উপরে ইমান আনা, 2 নানান নমুনার গোছল, দোয়া নিবার সময় আতাই দেওয়া, মউতর বাদে জিন্দা অইয়া উঠা, আর আখেরাতির বিচার। 3 ইনশাল্লা, আমরা অলাউ করমু।

4 অইলে যেরা একবার আল্লার পথ দেখিলাইছে, বেহেস্তি দানর মজা পাইছে, পাক রুহে শরিক অইছে, 5 আল্লার রহমতর কালামর মজা বুজছে, আর হামনর জমানার নানান কুদরতি কাম দেখছে, 6 দেখার বাদেও কাফিরি কাম করছে, এরার দিলরে আর বদলাইল যাইতো নায়, কারন তারা নিজে আল্লার খাছ মায়ার জন ইবনুল্লারে হিরবার দুখ-কষ্টর সলিবো কাতল করের, আর হকলর হামনে খুলা-মেলা তান গিবত গার। 7 যে মাটিয়ে বারে বারে মেঘর পানি অজম করিয়া গিরস্ত

অকলরে হাগ-তরকারি যুগাইয়া দেয়, ই মাটিত আল্লার রহমত নাজিল অয়। 8 অইলে যে মাটিত খালি বন-জংগল আর কাটা-গছা ফলে, ইতা বেকামা মাটি, ই মাটিত লান্নত পড়ে। মানষে ইতারে আণ্ডইনদি জালাইন।

9 ও মায়ার দুস্ত অকল, যুদিও আমরা ইলাখান কইরাম, অইলে আসলে আমরা খাছ দিলে মনো করি, তুমরার হালত এ থাকি বউত ভালা আছে, আর তুমরার জিন্দেগিত নাজাতর ফলও দেখা য়ার। 10 আল্লা তো হক-ইনছাফকারি, তুমরা তান লাগি যে মহববত দেখাইরায়, তান লাগি যেতা কাম-কাজ কররায়, তান পাক বন্দা অকলর খেজমত করিয়া আইরায়, ইতা তো তাইন ফাউরিতা নায়। 11 আমরার খুব ইচ্ছা অইলো, তুমরা পরতেক জনেউ হেশ পর্যন্ত একই লাখান কাম করাত আণ্ডয়াই আইবায়, যাতে তুমরার আশা পুরা অয়। 12 অউ লাখান কামো আণ্ডয়াইতে তুমরার আলসি না আয়; বরং ইমানে আর ছবরে যেরা আল্লার ওয়াদা করা বরকত হাছিল করছইন, তুমরাও তারার লাখান অইয়াও।

### আল্লার ওয়াদার নিচ্ছয়ত

13 হজরত ইব্রাহিমর লগে আল্লায় যেবলা ওয়াদা করছলা, ই সময় দুছরা কুস্তার নামে তাইন কছম খাইছইন না, কারন তান থাকি বড় দুছরা কুস্তাউ নাই, এরলাগি তাইন নিজর নামে কছম করিয়া কইছলা,

14 আমি নিচয় তুমারে বরকত নাজিল করমু,  
তুমার আওলাদ বউত পরিমানে বাড়াই দিমু।

15 ইব্রাহিমে অউলা বউত লাশ্বা সময় ছবর করিয়া আল্লার ওয়াদার ফল পাইলা। 16 মানষে যেবলা কনু কছম খায়, হে তার চাইতে দামি কেউরর নামে কছম খায়, তেউ বুজা যায় তার কছম হাছা, আর অউ কছমর লাগি হকলতা মিট-মাট অইয়ায়। 17 অউলা আল্লায়ও যেরার

লগে ওয়াদা করছইন, তান ওয়াদার নিচ্ছয়তার লাগিয়া তাইনও কছম খাইছইন, যাতে তান ওয়াদা রদ-বদল অওয়ার সন্দয় না থাকে। 18 আর আল্লায় কুনু মিছা মাতা তো বউত দুৱর কথা। তে তাইন য়েবলা ওয়াদার লগে কছমও করছইন, অখন আমরা আরো কত বেশি ভরসা রাখতাম পাৱি। এরলাগি আও, আমরা য়েরা তান দরবারো গিয়া আশ্রয় পাইছি, পাইয়া য়ে আশা পয়দা আছে, আমরাৱ ছামনর হউ আশারে মজবুত কৱি ধরিয়ৱ রই। 19 অউ আশা আমরাৱ জানর লংগরর লাখান, কাইম আর মজবুত। ইটায় আল্লাৱ বেহেস্তু এবাদত খানার পর্দা পাৱইয়া খাছ পাক জাগার ভিতরে আমরাৱে নিয়া পৌছায়। 20 আর আমরাৱ পক্ষ অইয়া ইছা গিয়া আমরাৱ আগে হি জাগাত পৌছি গেছইন। তাইন তো মালকী-সিদ্দিকর ছিলছিলার রেওয়াজ মাফিক হর-হামেশাকুর লাগি পরধান ইমাম অইছইন, তে অউ বেয়াপারে অখন কইরাম।

## 7

### আল্লাই ইমাম মালকী-সিদ্দিকর পরিচয়

1 ই মালকী-সিদ্দিক অইলা আল্লাতলার ইমাম, শালেমর বাদশা। ইব্রাহিমে বাদশা অকলরে যুদ্ধত আৱাইয়া হৱি ফিরিয়ৱ আওয়ার বালা অউ মালকী-সিদ্দিকর লগে তান মুলাকাত অইলে, মালকী-সিদ্দিকে ইব্রাহিমরে দোয়া করছলা। 2 ইব্রাহিমে তান হক্কলতার দশ বাটর এক বাট এনরে দিলাইলা। মালকী-সিদ্দিক নামর মানি অইলো, পৱেজগারর বাদশা। তাইন শালেম টাউনরও বাদশা, মানি শান্তির বাদশা। 3 মালকী-সিদ্দিকর মা নাই, বাফও নাই, তান কুনু খান্দান-নামাও নাই, তান হায়াতির শুরু বা শেষ নাই। তে বুজা যায়, তাইন আল্লাৱ খাছ মায়াৱ পুতর লাখান, হর-হামেশাকুর ইমাম।

4 তে চিন্তা কৱি দেখউক্কা, এইন কত মহান, য়েনরে আমরাৱ খান্দানর মুল বাবা ইব্রাহিমেও তান গনিমতর মালর দশ বাটর এক বাট দান কৱি দিছইন। 5 আর লেবি গুষ্টির মাজে য়েরা ইমামতি কাম করইন, তারা শরিয়তর হুকুম মাফিক তারাৱ ভাইয়াইন, মানি বনি ইসরাইলর গেছ থাকি দশ বাটর এক বাট আদায় কৱার এখতিয়াৱ পাইছইন। অউ

বনি ইসরাইলও তো ইব্রাহিমর খান্দানর মাজে জন্মিছইন। 6 অইলে হউ যে মালকী-সিদ্দিক ইব্রাহিমর খান্দানর না অইলেও, ইব্রাহিমর গেছ থাকি দশ বাটর এক বাট নিছলা, আর ইব্রাহিমরে দোয়াও দিছলা, যেন লগে আল্লায় নিজে ওয়াদা করছইন। 7 হরু অকলে বড় অকলর গেছ থাকি দোয়া পাইয়া থাকইন, এর মাজে তো সন্দয় নাই। 8 একবায়দি যে ইমামর মউত অয়, অউ লেবি গুষ্টির ইমাম অকলে দশ বাটর এক বাট আদায় করইন, আর আরকবায় মালকী-সিদ্দিক, কিতাবে কয় তাইন হর-হামেশা জিন্দা আছইন, তাইনও দশ বাটর এক বাট আদায় করছইন। 9 হিরবার ইখানও কওয়া যায়, লেবি গুষ্টির যে ইমামে দশ বাটর এক বাট আদায় করছইন, তাইনও ইব্রাহিমর মাজদি মালকী-সিদ্দিকরে দশ বাটর এক বাট দিছইন, 10 কারন মালকী-সিদ্দিকে যেবলা ইব্রাহিমর লগে মুলাকাত করলা, লেবি তো অউ সময় ইব্রাহিমর নাড়র ভিতরে আছলা।

### হজরত ইছা মালকী-সিদ্দিকর ছিলছিলার ইমাম

11 লেবি গুষ্টির ইমাম ছাব অকলর কাম-কাজর উপরে নির্ভর করিয়া আল্লায় বনি ইসরাইলরে শরিয়ত দিছলা, ই ইমামর মাজদি যুদি কামিল অওয়া যাইতো, তে লেবি গুষ্টির পয়লা ইমাম হারুনর বদলা মালকী-সিদ্দিকর নমুনার আরক ইমাম আওয়ার কুনু গরজ আছিল নি? 12 ইমামর ছিলছিল বদলাইল অইলে তো শরিয়তরেও বদলানি লাগে। 13 ই হকল বয়ান যান নিয়তে কররাম, এইন তো লেবি গুষ্টির নায়, আরক গুষ্টির, হি গুষ্টির কেউ কুরবানি খানার খাদিম আছলা না। 14 আমরার মুনিব তো এছদা গুষ্টির মাজে পয়দা অইছইন, ই গুষ্টির কেউ ইমাম অইবা করিয়া মুছায় কুস্তা কইছইন না। 15 মালকী-সিদ্দিকর নমুনায় যেবলা আরক জন ইমামে তশরিফ আনইন, ই সময় তো আমরার বয়ান আরো ছাফ অইগেছে। 16 ইছা তো রক্ত-মাংসর কুনু নিয়মে ইমাম অইছইন না, খালি তান হর-হামেশাকুর কুদরতি জিন্দেগির বলেউ অইছইন। 17 তান বেয়াপারে পাক কালামে কয়,

মালকী-সিদ্দিকর নমুনায়,



## তুমিউ হর-হামেশাকুর ইমাম।

18 তে দেখউক্লা, একবায় আগর ইমামতির হুকুম-আহকাম অকল কমজুর আর বেকামা অইযাওয়ায় ইতারে হরই দেওয়া অইছে, 19 মুছার শরিয়তে তো কুস্তারেউ কামিল বানাইতো পারছে না। আর আরকবায় অউলা এক মহান নয়া ওয়াদা জারি করা অইছে, ই ওয়াদার জরিয়ায় আমরা আল্লার আরো কাছাত আইতাম পারমু।

20 আর আগর ইমাম অকলর বেয়াপারে তো কুনু কছম করা অইছে না, অইলে ইছার ইমামতির বেয়াপারে আল্লায় কছম করছইন। 21 তাইন কছম করিয়া এনরে বওয়াল করছইন, আর কইছইন,

মাবুদে কছম খাইয়া কইরা, তুমিউ হর-হামেশাকুর ইমাম,  
তুমার বেয়াপারে তান মুনশা বদলাইতা নায়।

22 তে আমরা বুজরাম যেন, ইছা আল্লার লগে মানষর মিলনর আরো মহান এক উছিলার জামিনদার অইছইন। 23 আর লেবির গুষ্টি থাকি বউত মানষে ইমামতি করছইন, মউত অইযায় করি এরা কুনু জনউ হামেশা ইমামতি করতা পারছইন না। 24 অইলে ইছা তো হর-হামেশা জিন্দা আছইন, এরলাগি তান ইমামতি কুনুদিনও ফুড়াইতো নায়। 25 এরলাগিউ যেরা তান উছিলা লইয়া আল্লার কাছাত আয়, আল্লায় তারারে পুরাপুর নাজাত দান করইন, কারন তারার পক্ষে সুপারিশ করার লাগি তাইন হামেশা জিন্দা আছইন।

26 আসলে আমরার লাগি অউলা একজন পরধান ইমামর জরুরও আছিল, যেইন পাক-পরেজগার, বে-গুনা, গুনাগার অকল থনে আলগ, আর আল্লায় যেনরে আছমান অকলর উপরে তুলছইন। 27 বাকি হক্কল পরধান ইমামে পয়লা তান নিজর লাগি, বাদে তান কউমর গুনার লাগি পরতেক দিন কুরবানি আদায় করা লাগতো। অইলে অউ ইমামর লাগি ইতার জরুর আছিল না, কারন তাইন

তান নিজরে কুরবানি দিয়া একই বারে ই কাম আদায় করিলিছইন। 28 শরিয়তে যতো পরধান ইমাম অকলরে বওয়াল করছে এরা হকলউ কমজুর, অইলে শরিয়তর বাদে আল্লার কছম মাফিক যেনরে বওয়াল করা অইছে, এইনউ খাছ মায়ার পুত, হর-হামেশাকুর ইমামতির লাগি এনরে কামিল বানাইল অইছে।

## আল্লার লগে মিলনর নয়া আর চিরকালিন উছিলা (৮:১-১০:৩৯)

### 8

#### আল্লার লগে মিলনর নয়া উছিলা

1 আমরার বয়ানর মুল বেয়াপার অইলো, আমরার অউলা একজন পরধান ইমাম আছইন, যেইন বেহেস্তু আরশে-আজিমো আল্লার ডাইনর তখতো তশরিফ রাখছইন। 2 তাইন হউ আসল পাক জাগা, মানি বেহেস্তু এবাদত খানাত এবাদতি কররা, ই এবাদত খানা তো কুনু মানষর আতর বানাইল নায়, খালি মাবুদে নিজে বানাইছইন।

3 পশু কুরবানি আর লিল্লা-ছদগা আদায় করা অইলো পরতেক পরধান ইমামর দায়িত্ব, এরলাগি অউ পরধান ইমামর গেছেও কুরবানির জিনিস থাকতে অইবো। 4 তাইন যুদি অখন দুনিয়াত থাকতা তে ইমামতি করতা পারলা না অনে, কারন শরিয়তর হুকুম মাফিক কুরবানি দিবার ইমাম তো আছইনউ। 5 হি ইমাম অকলর কাম অইলো বেহেস্তু কামর নমুনা বা ছায়া, যেলা মুছায় হি এবাদত খানা বানানির সময় আল্লায় মুছারে হুশিয়ার করি কইলা, “দেখিও, অউ পাড়র উপরে তুমারে যেলা নকশা দেখাইলাম, এক্কেরে অউ লাখান করি হকলতা বানাইও।” 6 অইলে অখন আমরা দেখরাম, ইছায় ইমামতির যে দায়িত্ব পাইছইন, ইটা হি ইমাম অকল থাকি বউত ভাল, যেলা আল্লার লগে মানষর মিলনর আরো ভাল এক উছিলা লাগি তাইন জিম্মাদার অইছইন। ই উছিলা আগর উছিলা থাকি বউত ভাল; ই উছিলা তো বউত ভাল ভাল ওয়াদার উপরে কাইম অইছে। 7 আল্লার লগে আমরার মিলনর পয়লা

উছিল্লা যুদি নিখুত আইতো, তে দুছরা উছিল্লা কাইমর কুনু জরুর আছিল  
না। 8 আইলে আল্লায় তারার দুষ দেখাইছইন, যেলা আহমানি কিতাবে  
কয়,

মাবুদে কইরা, হনো, অলা এক অখত আইবো,  
যেবলা আমি বনি ইসরাইল আর এছদা গুষ্টির লাগি,  
আমার লগে মিলনর এক নয়া উছিল্লা কাইম করমু।

9 অউ নয়া উছিল্লা আগর হি উছিল্লার লাখান নায়,  
মিসর দেশ থাকি তারার ময়-মুরবিব অকলরে,

আজাদ করি আনার বালা যে উছিল্লা করহলাম।  
কারণ তারা আমার উছিল্লার উপরে ঠিক রইছে না,  
এরলাগি আমিও তারার লগ ছাড়ি দিছি,  
ইখান মাবুদে কইরাম।

10 আইলে আমি মাবুদে এওখানও কইরাম,  
ই জমানার বাদে আমি বনি ইসরাইলর লগে,  
আমার নয়া অউ উছিল্লা কাইম করমু,

আমার শরিয়ত তারার দিলর মাজে দিমু,  
তারার অন্তরর মাজে আমি লেখিয়া দিমু,

আমি তারার আল্লা অইমু,  
তারা অইবা আমার প্রজা।

11 তারা হকলেউ তারার আরি-ফরিরে,  
যারযির ভাই-বিরাদররে

ইলা তালিম দেওয়া লাগতো নায় বুলে, তুমরা আল্লারে চিনো।  
তারা হরু-বড় হকলে এমনেউ তো আমারে চিনবা,

12 কারণ আমি তারার হকল নাফরমানি মাফ করমু,  
তারার গুনারে আর কুনুদিনউ মনো রাখতাম নায়।

13 তে বুজা যায়, ‘নয়া□ কথা কইয়া তাইন পয়লা উছিলারে পুরান বানাইছইন, আর যেতা অচল-পুরান অইয়ায়, ইতা তো জলদি করি আরাইয়ায়।

## 9

### দুই লাখান এবাদত খানা

1 আল্লার লগে মানষর মিলনর পয়লা উছিলার মাজে, আল্লার এবাদতির লাগি নানান নমুনার নিয়ম-কানুন আছিল, আর দুনিয়াত এবাদত করার লাগি এখান এবাদত খানার কথাও লেখা আছিল। 2 হউ নিয়ম মাফিক এখান এবাদত-তাম্বু বানাইল অইছিল, হি এবাদত-তাম্বুর পয়লা কুঠাত আছিল চেরাগ দানি, পবিত্র রুটি আর ইতা রাখার টেবুল। ই কুঠার নাম আছিল পাক জাগা। 3 দুছরা পর্দার ভিতরে খাছ পাক জাগা নামে আরক কুঠা আছিল, ইখান অইলো হেরেম শরিফ। 4 ই কুঠার মাজে আছিল, সোনাদি বানাইল আগর-খুশবয় জালানি টেবুল, সোনাদি লেপা শাহাদত সন্দুক, সন্দুকর ভিতরে আছিল সোনার বৈয়ামো ভরা কুদরতি খানি মান্না, ইমাম হরুনর লাঠি, অউ লাঠিত কুদরতি ফুল ফুটিছিল। আরো আছিল আল্লার লগে মিলনর উছিলা লেখা হউ দুইও শাহাদত পাথর। 5 হি সন্দুকর উপরে আছিল আল্লার জালালি দুইও কারুবী, এরার ডাখনার ছায়ার তলর ছানিত গুনার কফরা আদায় করা অইতো। ইতা হক্কলতার খুটিনাটি বয়ান করা অখন জরুর নায়া।

6 ই হক্কলতা জুইত করার বাদে ইমাম অকলে ইমামতি কামর লাগি হামেশা পয়লা কুঠার ভিতরে হামাইতা। 7 অইলে দুছরা কুঠাত, মানি খাছ পাক জাগাত খালি পরধান ইমাম বছরো একবারউ হামাইতা পারতা, তাইনও কুরবানির লউ বিনা হিনো হামাইতা পারতা না। তান নিজর গুনা আর তান কউমর না-জানা হকল গুনার মাফির লাগি, কুরবানির লউ লইয়া হনো হামাইতা। 8 তে পাক রুহে দেখাইয়া দিরা, ই দুনিয়ার পয়লা এবাদত খানা যতদিন কাইম আছে, অতদিন হি খাছ পাক জাগাত

হামানির পথ খুলা অইতো নায়। 9 হি এবাদত খানা অইলো ই জমানার লাগি এক নিশানা, ই নিশানায় আমরারে বাতাই দেয়, অউ লাখান কুরবানি আর লিল্লা-ছদগায় এবাদতকারির বিবেকর খুতখুতি ভাব দুর করতে পারে না। 10 ইতা তো খালি খাওয়া-দাওয়া, অজু-গোছলর বেয়াপার, হক্কলতাউ খালি জাইরা শরিয়ত, দিলর কুস্তা নায়। ই শরিয়ত কাইম আছিল, আরো ভালা কুনু উছিল আইবার আগ পর্যন্ত।

11 অইলে অখন যতো ভালা ভালা বেয়াপার আইছে, আল-মসী তো অউ নয় তরিকার পরধান ইমাম অইছইন। তাইন আরো ইজ্জতি আরো বেশি কমিল এবাদত খানা অইয়া আইছইন। ই এবাদত খানা কুনু মানষর আতর বানাইল নায়, ইখান ই দুনিয়ার দুনিয়াবি কুস্তা নায়। 12 কুনু বিছাল বা ছাগলর লউ আতো লইয়া তাইন হিনো হামাইছইন না। খালি তান নিজর জান কুরবানির লউ দিয়া একবারউ খাছ পাক জাগাত হামাইছইন, হামাইয়া আমরারে হর-হামেশাকুর লাগি খালাছ করছইন। 13 আগে যেরা নাপাক বনিযিতো, তারার লাগি বিছাল বা ছাগলর লউ আর ডেকি-গরুর জলাইল ছালি ছিটাইয়া পাক-ছাফ করা অইতো, অইলে ইতায় তো এরার শরিলর বাইরগালা খালি পাক-ছাফ অইতো। 14 তে যেইন হর-হামেশাকুর জিন্দা রুহর মাজদিয়া, বে-গুনা কুরবানি অইয়া তান নিজর জানরে আল্লার নামে সপিয়া দিলাইছইন, হি আল-মসীর লউয়ে আমরার দিলরে নাপাকি কাম-কাজ থাকি আরো কত বেশি পরিমানে পাক-ছাফ করবো, যাতে আমরা জিন্দা আল্লার এবাদত-বন্দেগি করতাম পারি।

15 আর পয়লা উছিল চালু থাকতে মানষে যেতা গুনা করছলা, অউ গুনার আত থাকি খালাছ করার নিয়তে, কফরা হিসাবে আল-মসীর মউত অইছে। আল্লায় যেরারে দাওতদি আনিয়া চিরকালিন মৌরসি সম্পদ দিবার ওয়াদা করছইন, আল-মসী তো এরার লাগিউ নয়। উছিলার জিন্দাদার অইছইন। অউ মৌরসি সম্পদ অখন মানষে পাইবার সুযোগ অইছে, 16 কারন দুনিয়াবি নিয়মে মৌরসি সম্পদর কুনু অছিয়ত-নামা কামো লাগাইতে অইলে, পয়লা অউ অছিয়ত কররার মউত অইছে করি পরমান দরকার অয়। 17 মানষর মউতর বাদে তার অছিয়ত-নামা কামো লাগে, অছিয়ত কররা জিন্দা থাকতে ইতা কুনু কামো লাগে না।

18 ঠিক অউ লাখানউ, আল্লার লগে মিলনর পয়লা উছিলাও, মউতর লউ ছাড়া কামো লাগাইল অইছে না। 19 হজরত মুছায় শরিয়তর তামাম হুকুম-আহকাম বনি ইসরাইলরে জানানির বাদে, তাইন বিছাল আর ছাগলর লউর লগে পানি মিশাইলা, বাদে লাল রং করা মেড়ার রুমা আর এছুব গাছর ডেটাডি আল্লাই শরিয়ত কিতাবর উপরে, আর হক্কল মানষর গতরো ছিটাইয়া দিলা। 20 মুছায় কইলা, “ই লউ অইলো আল্লাই মিলনর হউ উছিলায় লউ, যে উছিলা মাফিক চলার লাগি আল্লায় তুমরারে হুকুম দিছইন।” 21 অউ নমুনায় তাইন এবাদত খানা আর এবাদতি কামর হক্কল মাল-ছামানার উপরেও লউ ছিটাইয়া দিলা। 22 আসল কথা অইলো, মুছার শরিয়ত মাফিক বেশির ভাগ জিনিসউ লউ দিয়া পাক-ছাফ অইতে অয়, কুরবানির লউ ছাড়া কুনুমন্তেউ গুনর মাফি পাওয়া যায় না।

### হজরত ইছাউ তামাম গুনর কফরা

23 যেতা জিনিস অকল খালি বেহেস্তি জিনিসর নিশানা, অতারে কুরবানির পশুর লউদি পাক-ছাফ করা জরুর আছিল, অইলে যেতা জিনিস আসল বেহেস্তি, ইতারে পাক-ছাফ করার লাগি তো আরো মহান কুরবানির জরুর। 24 আর আল-মসী তো হউ নিশানার জিনিসর লাখান, মানষর আতর বানাইল কুনু পাক জাগাত হামাইছইন না, তাইন খালি আসল বেহেস্তো হামাইছইন, যাতে আমরার নাজাতর লাগি আল্লার ছামনে অখন আজির অইতা পারইন। 25 হকল পরধান ইমামে কুরবানির পশুর লউ লইয়া যেলা পরতেক বছর খাছ পাক জাগাত হামানি লাগে, আল-মসী তো ই লাখান বারে বারে কুরবানি অওয়ার লাগি বেহেস্তো তশরিফ নিছইন না। 26 ই লাখান অইলে তো দুনিয়া পয়দা থাকি অখন পর্যন্ত তাইন বারে বারে কষ্ট পাইয়া কুরবানি অইতে অইলো অনে। অইলে তাইন তো আখেরি জমানাত অইয়া খালি একবারউ জাইর অইছইন, যাতে নিজরে কুরবানি দিয়া তামাম গুনর কফরা অইন। 27 আল্লায় তো ঠিক করিয়া দিলাইছইন, হক্কল মানষর খালি একবার মরন অইবো, আর মরন বাদে বিচার। 28 ঠিক অউ লাখান, বউত মানষর গুনর বোঝা বইবার লাগি আল-মসীরেও খালি একবারউ কুরবানি দেওয়া অইছে। তাইন দুছরা বার তশরিফ আনবা,

অইলে গুনার কফরা বনার লাগি আইতা নয়। খালি যেরা তান আশিক অইয়া বার চার, তারারে পুরাপুর নাজাত করার লাগি দুছরা বার আইবা।

## 10

### হজরত ইছার চিরকালিন কুরবানি

1 শরিয়ত অইলোগি খালি এক নিশানা, ইতায় ভবিষ্যতের নিয়ামতর কথা বাতাই দেয়, ইটা তো আসল কুনু বেয়াপার নয়। এরলাগিউ যেরা আল্লার এবাদত করার খিয়ালি অয়, শরিয়তর নিয়মে তারা বছর বছর একই লাখান কুরবানি দিয়া তো কুনুমশ্তেউ কামিল অইতো পারে না।

2 শরিয়তে যুদি তারারে পুরাপুর কামিল বানাইলিতো, তে তো পশু কুরবানি দেওয়া একবারেউ বন্দ অইগেল অনে। এবাদত কররা অকল যুদি একবারেউ পাক-ছাফ বনিযিতো, তে এরা নিজরে আর গুনাগার মনো করলো না অনে। 3 অইলে অউ পশু কুরবানিয়ে তারারে পরতেক বছর ইয়াদ করাইয়া দেয় যেন, তারা আসলে গুনাগার। 4 মুলত, ছাগল বা বিছালর লউয়ে মানষর গুনারে কুনু লাখানউ ছাফ করতো পারে না।

5 এরলাগিউ আল-মসীয়ে দুনিয়াত তশরিফ আনার কালো আল্লার দরবারো কইছইন,

পশু কুরবানি বা দান-ছদগা তো আসলে তুমি চাও না,

অইলে আমারে এখান কায়া দিছে বিলাই দিবার লাগি।

6 জালাইল কুরবানি বা গুনার কফরার কুরবানিয়ে

তুমি তো খুশি অইছো না।

7 তেউ আমি কইলাম, ও আল্লা,

দেখউক্কা, আমি তো অনো আইছি;

তুমার কালাম শরিফো যেলা আছে,

আমার জনম অইবো অউ জগতো,

তুমার মুনশারে কইম করার লাগি,

আর হাছাউ আমি আইছি।

8 উপরর আয়াত অকলর মাজে আল-মসীয়ে পয়লা কইরা, “পশু কুরবানি বা দান-ছদগা তো আসলে তুমি চাও না, জালাইল কুরবানি বা গুনার কফরার কুরবানিয়ে তুমি তো খুশি অইছো না।” শরিয়তর হুকুম মাফিক অউ কুরবানি অকল আদায় করা অইলেও, আল-মসীয়ে অলা কইলা। 9 বাদর আয়াতো তাইন হিরবার কইলা, “দেখউক্কা, আমি তো অনো আইছি, তুমার মুনশারে কাইম করার লাগি।” তে বুজা যায়, দুছরা উছিলারে কাইম করার নিয়তে, তাইন পয়লা উছিলারে বাতিল করিলিলা। 10 এরলাগি আল্লা পাকর হউ মুনশা মাফিক ইছা আল-মসীর কায়ারে খালি একবারউ কুরবানি দেওয়া অইছিল, অউ কুরবানির বলে আল্লার দরবারো আমরারে পাক-ছাফ করা অইছে।

11 পরতেক ইমাম ছাবে পরতিদিন আজির অইয়া আল্লার এবাদতি করইন আর বারে বারে কুরবানি আদায় করইন, তা-ও অউ লাখান কুরবানিয়ে কুন্দিনউ গুনারে ধইয়া ছাফ করতো পারে না। 12 অইলে আল-মসীয়ে তো চিরকালর গুনার মাফির লাগি খালি একবারউ কুরবানি অইয়া, আরশে-আজিমো আল্লার ডাইনর তখতো তশরিফ রাখছইন। 13 আর হউ সময় থাকি তাইন বার চাইরা, যতদিন পর্যন্ত দুশমন অকলরে তান পাওর তলাত ফালাইয়া চুরমার করা না অয়, অতো দিন বার চাইবা। 14 কারন তান অউ একবারর কুরবানির উছিলায় ঘেরারে পাক-ছাফ করা অইছে, এরারে চিরকালর লাগিউ তাইন পুরাপুর কামিল করছইন। 15 অউ বেয়াপারে আল্লার পাক রুহেও আমরার গেছে সাক্ষি দিরা, তাইন পয়লা কইছইন,

16 আমি মাবুদে কইরাম,

ই জমানার বাদে আমি বনি ইসরাইলর লগে,  
আমার নয়। অউ উছিল। কাইম করমু,

আমার শরিয়ত তারার দিলর মাজে দিমু,

তারার অন্তরর মাজে আমি লেখিয়া দিমু।



17 বাদে হিরবার কইরা,

আমি তারার নাফরমানি আর গুনারে  
আর কুনুদিনউ মনো রাখতাম নায়া।

18 তে বুজরায় নি, আল্লায় য়েবলা গুনা আর নাফরমানিরে মাফি  
দিলাইন, এরবাদে তো গুনার লাগি কুনুজাত কুরবানিরউ জরুর নাই।

### ইমানে মজবুত রওয়ার পরামিশ

19 এরলাগিউ ও ভাই অকল, হজরত ইছা আল-মসীর লউর  
জরিয়ায়, আমরা বেহেস্তি খাছ পাক জাগাত হামানির সাওস পাইছি।  
20 আল-মসীয়ে আমরা লাগি নয়। আর জিন্দা এক তরিকা খুলছইন,  
তান শরিল কুরবানির উছিলায় আমরা যানু খাছ পাক জাগার দুয়ারর  
পর্দা পারইয়া, আল্লার ছামনে আজির অইতাম পারি। 21 তে আমরা  
একজন পরধান ইমামও আছইন, আল্লার পরিবারর তামাম মানষর  
জিন্মা তো তান আতো দেওয়া অইছে। 22 এরলাগি আও, ইমানর  
মাজদি আমরা পুরাপুর নিচ্চিত বনিয়া খাটি দিলে আল্লার দরবারো  
আজির অই; কারন দুষি বিবেকর আত থাকি আমরা দিলরে আল-  
মসীর লউয়ে পাক-ছাফ বানাইছে, আর পরিস্কার পানি দিয়া আমরা  
নাওয়াইল অইছে।

23 মুমিন হিসাবে আমরা দিলো যে ভরসা আছে কইয়া স্বীকার করি,  
আও, অউ ভরসায় পুরাপুর মজবুত রইয়া তান তরিকায় চলি, কারন  
যেইন ওয়াদা করছইন এইন তো ষোলআনা হক-হালালি। 24 আমরা  
একে-অইন্যর লাগি খিয়াল করি, মহব্বত আর নেক কাম করার  
লাগি একে-অইন্যরে সাওস-পরামিশ দেই। 25 কুনু কুনু জনর স্বভাব  
অইলো, তারা জমাতে আইয়া শরিক অয় না, অইলে আমরা যানু অউ  
লাখান না অই। আল-মসীয়ে দুছরা বার তশরিফ আনার অখত যতো  
ঘনাইয়া আইওর, আমরা অতো বেশি করি একে-অইন্যরে সাওস-  
পরামিশ দেওয়াত রই।

26 আল্লা পাকর হক তরিকা জানার বাদেও যুদি আমরা জানিয়া-  
হনিয়া গুনা করাত রই, তে ই গুনার কফরার লাগি কুনুজাতর কুরবানি  
নাই। 27 আছে খালি হশরর ময়দানো কঠিন বিচারর লাগি ডরাই ডরাই  
বার চাওয়া, আর আল্লার দুশমন অকলরে জালাইয়া ছালি করার গজবর  
ডর। 28 কুনু জনে মুছার শরিয়তর হুকুম-আহকামর বরখেলাফ করলে,  
এরে কুনু মায়-মমতা না করিয়া দুই বা তিনজনর সাক্ষি লইয়া কাতল  
করিলতে অয়। 29 তে চিন্তা করি দেখউক্কা, যে জনে আল্লার খাছ  
মায়ার জন ইবনুল্লারে ঘিন করে, হে আরো কত বড় আজাবর ভাগি  
অইছে! যে লউর উছিলায় হে পাক-ছাফ অইছে, আল্লাই হউ উছিলায়  
লউরে হে এলামি করছে, আর যে পাক রুহে রহমত বখশিয়া দেইন,  
হউ রুহরেও বেইজ্জত করছে। 30 আসলে আমরা তো তানরে চিনিউ,  
যেইন ফরমাইছইন,

বদলা লওয়া আমার কাম,  
আমি পরতেক জনর আমলর বদলা দিমু।

আরক আয়াতো তাইন কইছইন,

মাবুদে তান বন্দা অকলর বিচার করবা।

31 বুজরায় নি, জিন্দা আল্লার ছামনে আজিরা দেওয়া কত বড় মছিবতর  
বেয়াপার!

32 তুমরা হউ দিনর কথা ইয়াদ করো, যেবলা ইছার তরিকার  
নুরর পথ পাইয়া হরি, বউত নমুনর জুলুম-মছিবতর মাজেও মজবুত  
রইছলায়। 33 কুনু কুনু সময় সমাজর ছামনে বেইজ্জতি, জুলুম-  
টিটকারি, টাট্টা-মশকরা হনিয়াও তুমরা নিজে কষ্ট সহ্য করছলায়।  
আর কুনু কুনু সময় অইন্যর উপরে অউ লাখান কষ্ট অইছে হনিয়া,

তারার লগে তুমরাও দুখিত অইছলায়। <sup>34</sup> তুমরার মাজর যেরা জেল খাটিছলা, তারার দুখে তুমরাও দুখি অইছলায়। তুমরার ধন-ছামানা লুট-পাট করা অইলেও খুশি আছলায়, আসলে বুজতায় পারছলায়, তুমরার লাগি আরো বউত ভালা ভালা ছামানা জমা আছে, যে ছামানা চিরকাল রইবো।

<sup>35</sup> তে অখন তুমরার হি মনোবল খুয়াইও না, এর মাজে তো বউত দামি পুরস্কার আছে। <sup>36</sup> তুমরা মজবুত রওয়া দরকার, যাতে আল্লায় যে পুরস্কার দিবা করি ওয়াদা করছইন, তান মর্জি মাফিক চলিয়া তুমরাও হউ পুরস্কার পাও। <sup>37</sup> আল্লায় তো কইছইন,

আর খুড়া কয়খান দিন বাকি আছে, যেইন তশরিফ আনার কথা,  
তাইন তশরিফ আনিলিবা, বেশি দেরি করতা নয়।

<sup>38</sup> আমার দীনদার বন্দায় ইমানর বলেউ আখের পাইবো,  
অইলে কেউ খরেদি পিছলি গেলে তার উপরে আমি খুশি রইতাম  
নায়।

<sup>39</sup> অইলে আমরা তো খরেদি পিছলিয়া বিনাশ অওয়ার মানুষ নয়।  
যেরা ইমান আনিয়া নাজাত হছিল করে, আমরা অইলাম হউ দলর  
মানুষ।

## ইমানি বুজুর্গান আর আল-মসীর বায় চাইয়া ছামনেদি দৌড়াই (১১:১-১৩:২৫)

# 11

### ইমানি বুজুর্গান

<sup>1</sup> ইমান কিতা? আমরা যেতা পাইমু করি আশা করছি, ইতা অখন  
না পাইলেও বাদে পাইমুউ পাইমু, অউ একিনর নামউ ইমান। অউ

ইমানর বলেউ আমরা নিচ্চিত অইয়া বুজি, অখন যেতা আমরার চউখে দেখরাম না, ইতা আসলেও আছে।<sup>2</sup> অউ ইমানর বলেউ আমরার ময়-মুরবিব অকলে আল্লার গেছ থাকি তারিফ কামাইছইন।<sup>3</sup> ইমানেউ আমরা বুজরাম যেন, আল্লায় তান কালামর বলেউ আছমান-জমিনর হক্কলতা পয়দা করছইন, ইতা আমরার চখুর দেখা কুন্ চিজ থাকি এমনে পয়দা অইছে না।

<sup>4</sup> ইমানর বলে হাবিলে আল্লার নামে কাবিলর চাইতে ভালা কুরবানি আদায় করলা। এরলাগি আল্লায় হাবিলর বেয়াপারে বাতাইলা, এইন একজন কামিল মানুশ। তে বউত জমানা আগে হাবিলর মউত অইলেও, ইমানর বেয়াপারে তাইন অখনও আমরার লগে মাতির।

<sup>5</sup> ইমানর বলর লাগিউ ইদ্রিছ নবীর মউত অইলো না, আল্লায় তানরে জিন্দা হালতে বেহেস্তো তুলিয়া নিলাগি, দুনিয়াত তানরে তুকাইয়া মিললো না। ইদ্রিছরে বেহেস্তো তুলিয়া নেওয়ার আগে আল্লায় জানাইছলা, ইদ্রিছ আমার খুশি মাফিক চলছইন।<sup>6</sup> অইলে ইমান ছাড়া তো কেউ আল্লারে খুশি করতো পারে না। যেকুন্ মানুশ আল্লার ধারো যাইতে চাইলে, হে একিন করা লাগবো যেন, আল্লা আছইন, আর যেরা তান তালাশ করে, তাইন এরারে পুরস্কার দেইন।

<sup>7</sup> ইমানর বলে নুহ নবীর জমানাত যেতা ঘটনা দেখা গেছিল না, আল্লার হুশিয়ারি পাইয়া তাইন অতা একিন করলা, একিন করিয়া নিজর পরিবাররে বাচানির লাগি এখান জাজ বানাইলা। তান অউ ইমানি কামর মাজদি জগতর নাফরমানির পরমান দেখাইলা, আর আল্লার দরবারো পরেজগার হিসাবে গইন্য অইগেলা, খালি ইমানর বলেউ ইলা অওয়া যায়।

<sup>8</sup> ইমানর বলে ইব্রাহিম নবীয়ে আল্লার হুকুম পাইয়াউ নিজর ভিটা-মাটি ছাড়িয়া রওয়ানা দিলা। আল্লায় তানরে যে দেশ দিতা করি ওয়াদা করছইন, হি দেশখান কুন জাগাত, ইখান না জানিয়াও তাইন রওয়ানা অইগেলা।<sup>9</sup> ইমানর বলে তাইন আল্লার ওয়াদা করা হউ কেনান দেশর ভিতরেও মুছাফিরর লাখান দিন কাটাইলা। তান লগে আরো যেরা হি ওয়াদার ভাগি আছলা, হউ ইসহাক আর ইয়াকুবর লাখান তাইনও

তাম্বুয়ে তাম্বুয়ে রইয়া জিন্দেগি কাটাইলা। 10 আসলে যে টাউন হর-হামেশা কাইম রইবো, হউ বেহেস্তি টাউনর লাগি তাইন বার চাওয়াত আছিল, ই টাউনর নকশা-নমুনা সহ হক্কল কারিগরি স্বয়ং আল্লার কাম।

11 ইমানর বলে ইব্রাহিমর নিআওলাদি বিবি ছায়রায় আওলাদ জনম দেওয়ার খেমতা পাইলা, তারার হরুতা পয়দার বয়স পারইগেলেও ইব্রাহিমে একিন করছিল, যেইন ই ওয়াদা করছইন, এইন তো হক, এইন নিজর ওয়াদা পুরাইবাউ পুরাইবা। 12 এরলাগি বয়সর ভাৰে মরার পথি অউ এক ইব্রাহিম থাকি অতো মানুষ জনম লইলা, যেরা আহমানর তেরা আর দরিয়ার চরর বালুর লাখান, গনিয়া ফুড়াইল যায় না।

13 মজবুত ইমানে জিন্দেগি কাটাইয়া এরা হকলর মউত অইছে, এরা কেউ হি ওয়াদার ফল ভোগ করতা পারছইন না, খালি দুরই থাকি ইতা দেখিয়া হারি খুশি অইছইন। ই দুনিয়াত তারা মুছাফিরিত আইছইন, ইখান তারার নিজর বসত খানা নায়, ইতা তো তারা মানছইন। 14 আর যেরা ইখান মানছইন, তারা হকলেউ সুন্দর করি বুজাইছইন যেন, তারা নিজর আপন দেশর তালাশ কররা। 15 যে জমিন থাকি তারা বারইয়া আইছিল, হি জমিনর কথা থিয়াল করলে তো তারা হিরবার হনো হামানির সুযোগ পাইলা অনে। 16 অইলে তারা তো আরো ভাল এক দেশ, মানি বেহেস্তর তালাশ করছিল। এরলাগিউ আল্লা পাকে নিজরে তারার আল্লা কইয়া পরিচয় দিতে কুনু শরম পাইন না, তাইনউ তারার লাগিয়া আরামর এক টাউন তিয়ার করছইন।

17 ইব্রাহিম নবী পরিষ্কাত পড়িয়া হারি ইমানর বলেউ তান পুয়া ইসহাকরে কুরবানি দিছিল। যে ইব্রাহিমর লগে আল্লায় নিজে ওয়াদা করছইন, হউ জনে তান খাছ মায়ার পুতরে কুরবানি দিলাইতা চাইছইন। 18 যে পুতর বেয়াপারে আল্লায় বাতাইছিল, “তুমার পুয়া ইসহাকর খান্দানরেউ তুমার খান্দান কইয়া গনা অইবো।” 19 ইব্রাহিমর দিলর অউ একিনে তাইন কুরবানি দিতে রাজি অইছিল। যেন, আল্লায় তো মুর্দারেও জিন্দা করতা পারইন। আর হাছাউ মউতর তল থাকি ইসহাকরে ফিরত পাইলা।

20 ইমানর বলে ইসহাকে তান পুয়াইন ইয়াকুব আর ইসর ভবিষ্যত জিন্দেগির লাগি দোয়া দিছিল।

21 ইমানর বলে ইয়াকুবে মউতর অখতো ইউছুফর দুইও পুয়ারে দোয়া দিলা, তাইন নিজর লাঠির উপরে ভরদি আল্লার এবাদতি করলা।

22 ইমানর বলে ইউছুফে মউতর অখতো কইছলা, তান নিজর জাতি বনি ইসরাইল মিসর দেশ থাকি বারইয়া যাইবা, তারা যাওয়ার কালো তান আডিড-গুডিডরে বইয়া নেওয়ার হুকুম দিলা।

23 ইমানর বলেউ মুছার মা-বাকে মুছার জন্মর বাদে তিন মাস পর্যন্ত লুকাইয়া থইলা, তারা দেখছলা, পুয়াগু খুব সুন্দর, বাদশার হুকুমেও তারা ডরাইলা না। 24 ইমানর বলেউ মুছায়, তান বুজদার অওয়ার বাদে ফেরাউনর পুড়ির ঘরর নাতি কইয়া পরিচয় দিতে রাজি অইলা না। 25 তাইন গুনার মাজে রইয়া থুড়া কয়দিন সুখ কামানির চাইতে, আল্লার বন্দা অকলর লগে মিলিয়া জুলুম-মছিবতর মাজে রওয়াউ পছন্দ করলা। 26 তাইন মিসরর হক্কল জাক-জমকর চাইতে, আল-মসীর নামে দুর্নাম হাছিলরেউ বেশি মূল্যবান মনো করলা, কারন তান নজর আছিল বেহেস্তি পুরস্কারর বায়। 27 ইমানর বলে তাইন মিসর থাকি বারই গেলা, বাদশার গুছারেও ডরাইলা না। নিরাকার আল্লারে দেখিলাইছইন, অউলা মনো করিয়াউ তাইন ছবর করি রইলা। 28 ইমানর বলেউ তাইন আজাদি ইদ আর লউ ছিটাইয়া দেওয়ার নিয়ম মানলা, যাতে আজরাইল ফিরিস্তায় বনি ইসরাইলর পয়লা পুয়াইন্তরে না ছইন।

29 ইমানর বলেউ মানষে নীল দরিয়ার মাজেদি হকনা মাটির পথর লাখান আটিয়া গেলা, অইলে মিসরি অকলে ইলা যাওয়াত লাগিয়া বুড়িয়া মরলা।

30 ইমানর বলেউ বনি ইসরাইলে ঘিরিহো টাউনর বাউস্তরির ওয়াল সাতদিন চক্কর দেওয়ার বাদে এমনেউ পড়িগেল।

31 ইমানর বলেউ অউ টাউনর রাহবা নামর বদমাইশ বেটিয়ে বনি ইসরাইলর গুইয়া অকলরে মেহমানদারি করায়, হিনর নাফরমান অকলর লগে ই বেটি বিনাশ অইলা না।

32 আর কত জনর বয়ান কইতাম? জিদাউন, বারাক, শিমশুন, ইফতা, দাউদ, শামুয়েল আর নবী অকলর ইমানি বলর বয়ান করাত লাগলে সময়ে কুলাইতো নায়। 33 ইমানর বলে এরা বউত দেশ দখল করছইন, হক ইনছাফ কাইম করছইন, আল্লাই ওয়াদার ফায়দা হাছিল করছইন, সিংহর মুখ বন্দ করছইন, 34 আগুনির কুডলির তেজ

কমাইলিছইন, তলোয়ারর ছামন থাকি রেহাই পাইছইন, কমজুর থাকিও বল হাছিল করছইন, জিহাদর মাজে বল-খেমতা দেখাইছইন, ভিন-দেশি অকলর ফৌজরে খেদাইয়া দিছইন।<sup>35</sup> বেটিস্তে তারা যারযির মুর্দা অকলরে হিরবার জিন্দা হালতে পাইলা।

আরো বউতে জানর মায়া ছাড়িয়া জুলুম-নির্যাতন সইয্য করিয়া মরলা, যাতে কিয়ামতর বাদে বেহেস্তু সুখ পাইন।<sup>36</sup> বউতে টাট্রা-মশকরা আর মাইর-ধইর সইয্য করছইন, বউতে ডান্ডা-বেড়ি সহ জেল খাটিছইন।<sup>37</sup> মানষে তারারে কাংকড়দি ইটাইছইন, করাতিদি চিরিয়া দুই টুকরা করছইন, তলোয়ারদি কাতল করছইন। তারা জুলুম-মহিবত, জালা-যন্ত্রনা পাইছইন, অভাবর ঠেলায় পশুর চামড়া ফিন্দিয়া শরম লুকাইছইন।<sup>38</sup> ই দুনিয়া তারার জুকা আছিল না, তারা পাড়-জংগল, মরুভূমি, আর গাত-গাড়ার মাজে রইয়া দুনিয়ার জিন্দেগি কাটাইছইন।

<sup>39</sup> ইমানর বলর লাগি এরা হক্কেলে তারিফ কামাইছইন, তা-ও আল্লার ওয়াদার ফল ই দুনিয়াত পাইছইন না।<sup>40</sup> কারন আল্লায় আমরার লাগি হউ জমানা থাকি আরো ভাল পুরুস্কার থইছইন, যাতে আমরারে বাদ দিয়া তারা কামিল না বনইন।

## 12

### আল্লায় মুমিন অকলরে শাসন করইন

<sup>1</sup> তে আমরা দেখরাম, ইমানি তেজর বউত সাক্ফি আমরার চাইরোবায় আছে। এরলাগি আও, আমরাও হকল জায়-জামেলা হরাই, যে গুনায আমরারে পেচাইয়া রাখে, অতারে হরাইয়া ফালাই, আর দৌড়াওরা দলর লগে অইয়া ধৈর্য ধরি হেশ পর্যন্ত দৌড়াই।<sup>2</sup> আউক্কা, আমরার নজর রাখি মালিক ইছার বায়, আউয়াল থাকি আখের পর্যন্ত তাইন অইলা আমরার ইমানর মুল খুটি। তান লাগি যে খুশি রাখা অইছে, অউ খুশির বায়দি চাইয়া, দুখ-কষ্টর সলিবর উপরর মউতরেও কবুল করলা, ই বেইজ্জতিরে কুনু দাম দিলা না। আর অখন আরশে-আজিমো আল্লার ডাইনর তখতো তাইন তশরিফ রাখছইন।<sup>3</sup> তে যেইন গুনাগার

মানষর অতো বড় দুশমনিরে সইয্য করলা, তান বেয়াপারে চিন্তা করো, যাতে তুমরার দিলো কুנו কমজুরি বা নিরাশা না আয়।

4 গুনার লগে লাড়াইত লাগিয়া তো লউ বারনির দশা তুমরার অখনও অইছে না। 5 তুমরার গাইবি বাফ আল্লায়, তান আওলাদ হিসাবে তুমরারে যে নছিয়ত করছইন, তুমরা ইতা ফাউরিলিছো নি? কিতাবো আছে,

ও আমার পুত, মাবুদর শাসনরে এলামি করিও না,  
তাইন কুנו ধামকি দিলে, বেজার অইও না।

6 কারন মাবুদে যেরারে মহব্বত করইন,  
তারারেউ শাসন করইন,  
যেরারে তাইন আওলাদ হিসাবে কবুল করিলাইন,  
এরা পরতেক জনরে সাজা দেইন।

7 শাসন মনো করিয়া তুমরা কষ্ট স্বীকার করো। বাফে-পুতে যেলাখান সম্পর্ক, আল্লায়ও তুমরার লগে অউলা সম্পর্ক রাখছইন। ইলা কুנו পুত আছে নি, যারে তার বাফে শাসন করইন না? 8 হক্কল পুতরেউ শাসন করা অয়। তুমরারে যুদি শাসন করা না অয়, তে তো তুমরা ফুংগা, আসল পুত নায়। 9 জানো তো, আমরার দুনিয়াবি বাফ অকলে আমরারে শাসন করইন, আর আমরা তারারে ইজ্জত করি। তে যেইন আমরার আছমানি বাফ, তান গেছে গর্দনা নোয়াইয়া চলা আমরা লাগি জরুর নায় নি, যাতে আমরা জিন্দেগি পাই? 10 আমরা দুনিয়াবি বাফ অকলে যেলা ভালো মনো করতা, অলা আমরা শাসন করতা, আর ইতা তো খুড়া কয়দিনর লাগি, অইলে আল্লায় তো আমরা শাসন কররা যাতে আমরাও তান পাক-পবিত্রতা হাছিল করি। 11 কুנו শাসনরেউ খুশির বেয়াপার মনো করা অয় না, দুখর বেয়াপারউ মনো অয়, অইলে যেরা শাসন মানিয়া চলে, তারা বাদে দীনদারির শান্তিআলা জিন্দেগি পায়। 12 এরলাগি তুমরার কমজুর আতরে মজবুত করো,



দুর্বল আটুরে সবল করে। 13 তুমরা সিদা পথে আটো, যাতে লেংড়া পাও আর না কচকে, বরং ভালা অইয়ায়।

### আল্লার গজব থাকি জান বাচাও

14 হকল মানষর লগে শান্তিয়ে বসত করা আর পাক-পাকিজা অইয়া চলার লাগি খিয়ালি অও, ইলা না চললে কেউ মালিকর দরশন পাইতায় নায়া। 15 হুশিয়ার রইও, যাতে কেউ আল্লার রহমত থাকি বাদ না পড়ে। খিয়াল রাখিও, তুমরার মাজর কেউ যানু বিষাক্ত তিত্বা গাছর জড়র লাখান বারইয়া না ছাতায়, আর বউত মানষরে নাপাক না বানায়। 16 হজরত ইয়াকুবর ভাই ইসর লাখান কুনু বে-পথি নাফরমান পয়দা না অয়। ইসে তো খালি এক অখতর খানির লাগি, তার নিজর মৌরসি মালিকানা বেচিলাইছে। 17 তুমরার তো জানাউ আছে, যুদিও বাদে হে চখুর পানি ফলাইয়া কান্দি কান্দি দোয়া মাংগিছিল, অইলে তৌবা করার সুযোগ আর হে পাইছে না।

18 তুমরা নিচ্ছয় ইলা কুনু পাড়র কান্দাত আইছো না, যে পাড়ে আতদি ছওয়া যায়। হউ তুর পাড়র জলাইল আণ্ডইন, গইন আন্দাইর, হিল-তুফান, 19 শিংগার আওয়াজ, বা জুরে জুরে মাত-কথার কুনু আওয়াজর গেছেও আইছো না। জুরে জুরে মাতর অউ আওয়াজ যেরা হনছিল, তারা মিনত করি কইছিল, যাতে তারার লগে আর বাতচিত করা না অয়। 20 তারা আল্লার অউ হুকুম সইতো পারছিল না, আল্লায় কইছলা, “যুদি কুনু পশুয়েও ই পাড়ে ছয়, তে তারেও কাংকড় মারিয়া মারিলিতে অইবো।” 21 অউ সময় যেরা মাবুদর দিদার দেখছিল, তারা অতো ডর ডরাইছিল যেন, স্বয়ং মুছা নবীয়ে কইলা, “ডরর চুটে আমি কাপিরামা।”

22 অইলে তুমরা তো পবিত্র ছিয়ন পাড় আর জিন্দা আল্লার টাউনর কাছাত আইছো, আজার আজার ফিরিস্তায় যেখানো খুশি-বাসির মাহফিল কররা, হনো আইছো। ই টাউন অইলোগি, বেহেস্তি জেরুজালেম। 23 বেহেস্তি খাতাত যেরার নাম লেখা অইগেছে, বড় পুয়ার লাখান যেরারে ইজ্জত দেওয়া অইছে, এরার বানাইল জমাতর ধারো আইছো। যেইন তামাম মানষর বিচার করইন, হউ আল্লার

কাছাত আইছো। যে পরেজগার অকল পুরাপুর কামিল আইগেছইন, এরার রুহর মজলিছো আইছো। 24 যে ইছা আল্লার লগে মিলনর নয় উছিলার জিন্মাদার, হউ ইছার গেছে আইছো। হাবিলর লউ থাকি আরো মরতুবাআলা যে লউ, তুমরা ছিটাইল হউ লউর কাছাত আইছো।

25 মুছা নবীয়ে আল্লাই হুশিয়ারির কথা দুনিয়ার মানষরে জানানির বাদে যেরা তান হুশিয়ারিরে এলামি করছিল, এরা যেবলা রেহাই পাইছইন না, তে যেইন বেহেস্তো থাকিয়া আমরারে হুশিয়ার কররা, তান হুশিয়ারিরে এলামি করলে তো এক্কেবারে নিচ্চিতউ আমরা কুন্ রেহাই পাইতাম নয়। এরলাগি খিয়াল রাখিও, যেইন হউ বাতচিত করছইন, তান হুকুমরে এলামি করিও না। 26 হি আমলো আল্লা পাকর মুখর আওয়াজে হারা দুনিয়ারে কাপাইছিল, অইলে অখন তাইন অউ ওয়াদা করছইন, “আমি দুছরা বার খালি ই দুনিয়ারে নয়, আছমানরেও কাপাইমু।” 27 তে “দুছরা বার” অউ শব্দ থাকি বুজা যায় যেন, যেতা জিনিস অকল লাড়া-চাড়া করাইল যায়, মানি যেতা পয়দা করা অইছে, ইতারে বাদ দেওয়া অইযিবো, আর যেতারে লাড়া-চাড়া করা যায় না, অতা কাইম রয়। 28 বুজরা নি, যে বাদশাইরে লাড়া-চাড়া করা যায় না, আমরা তো হউ বাদশাই পাইরাম, এরলাগি আউক্লা, আমরা আল্লার দরবারো শুকরিয়া জানাই। আল্লা পাক যে নমুনায় খুশি অইন, অউ নমুনায় আমরা তান এবাদত করতাম পারমু, তানরে ডরাইয়া, তাজিম করিয়া এবাদত করমু। 29 কারন আমরা আল্লা তো বিনাশ কররা আগুনির লাখান।

## 13

### আখেরি নছিয়ত

1 তুমরা একে-অইন্যরে আপন ভাইর লাখান হামেশা মায়া করিও।  
2 মেহমানদারি করা ফাউরিও না। জানো নি, কুন্ কুন্ জনে না চিনিয়া আল্লার ফিরিস্তারও মেহমানদারি করছইন। 3 জেল খানাত যেতা মানুষ বন্দি আছইন, নিজরেও অলা বন্দি মনো করিয়া তারারে সাইয্য করিও,

আর যেরার উপরে জুলুম-মছিবত করা অর, নিজে অউ মছিবতো পড়ছো মনো করিয়া, তারারে খিয়াল করিও।

4 হকলেউ বিয়া-শাদিরে ইজ্জত করিও। জামাই-বউর সম্পর্করে পাক-পবিত্র রাখিও। মনো রাখিও, আল্লায় কু-নজরি, জিনাকুর আর লুচ্ছা অকলর বিচার করবা।

5 দুনিয়াবি ধন-ছামানার লালছ থাকি হরিয়া রইও। তুমরার যেতা আছে, অতা লইয়াউ খুশি রইও। আল্লায় বাতাইছইন,

আমি কুনুমন্তেউ তুমারে ছাড়তাম নায়,  
কুনা হালতেউ তুমারে ফালাইতাম নায়।

6 এরলাগিউ আমরা হিন্মত করিয়া কইতাম পারিয়ার,

মাবুদ আমার সহায় আছইন, আমি ডরাইতাম নায়।  
মানষে আমার কিতা করতো?

7 ছনো, যে বুজুর্গ অকলে তুমরারে আল্লার কালাম তালিম দিছইন, তারার কথা ইয়াদ করিও। তারার জিন্দেগির হালতর কথা ভালামন্তে চিন্তা করিয়া, তুমরাও তারার লাখান ইমানে মজবুত অও। 8 ইছা আল-মসী গতকাইল যেলা আছলা, আইজও অলা আছইন, আর হর-হামেশাউ অলা রইবা।

9 নানান নমুনার নয় নয়া তালিমে যানু তুমরারে বে-পথে না নেয়, খানা-পিনার খুটিনাটি বিষয় না তুকাইয়া, বরং আল্লার রহমতর উপরে কাইম রও। ইলা খুটিনাটি নিয়মর উপরে যেরা ভরসা করতো, ইতায় তো তারার কুনু লাভ অইছে না। 10 আমরার তো এখন কুরবানি খানা আছে, ইখানর কুস্তা খাইবার এখতিয়ার মুছা নবীর এবাদত-তাম্বুর ইমাম অকলর নাই।

11 গুনার মাফির লাগি জবো করা পশুর লউ লইয়া, বনি ইসরাইলর পরধান ইমাম অকল এবাদত খানার খাছ পাক জাগাত হামাইন, অইলে অউ পশুর আডিড-মাংস হকলতা বনি ইসরাইলর কেম্পর বারে নিয়া জালাইল অয়। 12 অউ লাখান হজরত ইছাও জেরুজালেম টাউনর বারে গিয়া জুলুম-কষ্ট সইহ্য করিয়া মউত কবুল করলা, যাতে তান নিজর লউর উছিলায় মানষরে গুনা থাকি পাক-ছাফ করতা পারইন। 13 অখন আউক্লা, আমরাও তান বদনামরে নিজর কান্দো লইয়া কেম্পর বারে তান কান্দাত যাইগি। 14 কারন ই দুনিয়াত আমরার লাগি স্থায়ী কুনু টাউন নাই, আমরা খালি হউ টাউনর তালাশ কররাম, যে টাউনর দিদার বাদে পাইমু।

15 তে অখন আমরা আল-মসীর জরিয়ায় হামেশা আল্লার দরবারো জিকির-আজকার কুরবানি করি, মানি দুইও ঠোটে তান নামর গুনগান গাই। 16 নেক কাম করা আর অভাবি মানষরে দান-খয়রাত বিলানি ফাউরিও না, কারন অউ লাখান কুরবানিয়ে আল্লা পাক খুশি অইন।

17 তুমরার মুরবিব অকলর হুকুম মানিয়া তারার গেছে মাথা নোয়াইয়া রইও, আল্লার দরবারো হিসাব দেওয়া লাগবো করি তারা হামেশা তুমরার জানর পারাদার অইয়া কাম কররা। অখন তারা যাতে খুশি মনে ইতা করইন, এরলাগি তুমরা বাইধ্য রইও। তারা যুদি মনো দুখ পাইয়া তুমরার লাগি কাম করইন, তে তুমরার ভালাই অইতো নায়।

18 আমরা লাগি দোয়া করিও। আমরা তো জানি, আমরা বিবেক ছাফ-ছফা আছে, হক্কল বেয়াপারে হক পথে চলতাম চাই। 19 আমি খাছ করি তুমরার গেছে অউ দোয়া চাইরাম, যাতে জলদি করি আমি হিরবার তুমরার লগে মুলাকাত করতাম পারি।

বিদায়ি ছালাম আর দোয়া

20 আল্লার লগে আমরা মিলন, হর-হামেশাকুর উছিলা,  
 পুরাপুর কাইম করার লাগিয়া,  
 আমরা মালিক হজরত ইছা, নিজর লউ বিলাই দিয়া,  
 মেড়া পালর মহান রাখাল বনিছইন।  
 হজরত ইছার মউতর বাদে, শান্তি দেউরা আল্লা পাকে,  
 মূর্দা থাকি তানরে জিন্দা করিছইন।

21 হকল নেক কামর তৌফিক দেউক্কা, তান মর্জি যুগাইয়া চলার,  
 আর তাইন যেতা পছন্দ করইন,  
 দিলো অতার এশকি দেউক্কা, ইছা আল-মসীর জরিয়ায়,  
 এন মহিমা হর-হামেশা রউক, আমিন।

22 ভাই অকল, তুমরার গেছে মিনত কররাম, তুমরা বিরক্ত না অইয়া  
 ই নছিয়ত ছনো, আমি খুব শটকাটে লেখলাম। 23 ছনো, আমরার ভাই  
 তিমথিয়ে খালাছ পাইছইন, তাইন যুদি সময় মত আমার অনো আইন,  
 তে আমি তুমরার গেছে আওয়ার সময় তানে লগে লইয়া আইমু।

24 তুমরা নিজর মুরবিব অকলরে, আর পাক বন্দা অকলরে আমার  
 ছালাম জানাইও। ইতালি দেশর মানষে তুমরারে ছালাম জানাইরা।

25 তুমরা হকলর উপরে আল্লার রহমত কাইম রউক। আমিন॥

**Sylheti New Testament (Bengali)**  
**Sylheti: Sylheti New Testament (Bengali) New**  
**Testament+**

copyright © 2014 Ahle Kitab Society

Language: (Sylheti)

Contributor: The Seed Company

All rights reserved.

2020-11-30

---

PDF generated using Haiola and XeLaTeX on 28 Sep 2022 from source files  
dated 13 Jun 2022

8c22fe10-239b-5db1-b41d-13aad0957f43